



Hidžra – lekcije i smjernice (Medina)

Hatib: dr. Husejn ibn Abdulaziz Alu Šejh

26. zulhidže 1447. po Hidžri / 12. juni 2026.

Hvala Allahu, Gospodaru Koji mudro upravlja mjesecima i godinama, smjenjuje noći i dane. Svjedočim da nema boga osim Allaha, Jedinog, Koji nema sudruga, Vlasnika veličanstva i plemenitosti. Svjedočim da je naš vjerovjesnik Muhammed, sallallahu alejhi ve sellem, Njegov rob i poslanik, poslan kao milost svim ljudima. Allahu, donesi salavat, selam i bereket na njega, na njegovu porodicu i njegove plemenite ashabe.

Poštovani vjernici, oporuka koju je Allah ostavio i prvim i potonjim generacijama jeste bogobožnost i pokornost Njemu, Uzvišenom. Allah kaže: "Mi smo onima kojima je data Knjiga prije vas, a i vama, već zapovjedili da se bojite Allaha" (En-Nisa, 131).

Poštovani vjernici, nalazimo se na pragu nove hidžretske godine, godine koja nas podsjeća na hidžru Allahovog Poslanika, sallallahu alejhi ve sellem. Zato je dužnost svakog muslimana da iznova oživljava sjećanje na njegov život i misiju, kako bi svoj ovozemaljski život ispunio dobrom i doživio sretan i pohvalan završetak. Uzimajući Poslanikov život kao uzor i putokaz, čovjek postiže uspjeh, a slijedeći njegovu uputu dolazi do istinske čestitosti i spasa.

Uzvišeni Allah kaže: "Reci: 'Ako Allaha volite, mene slijedite, i vas će Allah voljeti i grijehе vam oprostiti!'– A Allah prašta i samilostan je." (Ali Imran, 31)

Jedan od najvažnijih događaja iz Poslanikovog blagoslovljenog života jeste hidžra, sa svim svojim iskušenjima, teškoćama i žrtvama. To je događaj iz kojeg kao pojedinci i zajednica možemo uzimati neiscrpne pouke i smjernice za život. Kroz ispravno razumijevanje hidžre bolje razumijevamo Allahovu Objavu, njene poruke i ciljeve.

Uzvišeni kaže: "A tebi objavljujemo Kur'an da bi objasnio ljudima ono što im se objavljuje, i da bi oni razmislili." (En-Nahl, 44)





Muslimanski ummet neće pronaći pravi izlaz iz svojih problema, iskušenja i rana koje ga pogađaju sve dok se ne vrati svjesnom i ispravnom razumijevanju Allahove Knjige i sunneta Njegovog Poslanika, sallallahu alejhi ve sellem, kroz vjerodostojne izvore i ozbiljno promišljanje o njihovim porukama.

Hidžra nosi u sebi brojne lekcije i vrijedne poruke. U njima se kriju koristi za vjeru i život, kao i smjernice kako postići dobro, a izbjeći ili umanjiti štetu. Nemoguće je na jednom mjestu obuhvatiti sve te pouke, pa ćemo se danas zadržati na dvije posebno važne.

Prva poruka jeste da je cijeli život Allahovog Poslanika, sallallahu alejhi ve sellem, bio usmjeren ka jednom velikom cilju – pozivu u vjerovanje u jednog Boga i iskreno robovanje samo Njemu.

Nijedna etapa njegovog života, pa ni sama hidžra, nije bila odvojena od tog poziva. Poziv u tevhid, učvršćivanje vjere i udaljšavanje od svih oblika mnogoboštva bili su prisutni u svim okolnostima: dok je bio progonjen i tražen, dok je gradio zajednicu u Medini i kada je, oslobođenjem Meke, ostvario veliku pobjedu.

Zato briga o ispravnom vjerovanju i iskrenom odnosu prema Allahu treba ostati trajna zadaća svakog muslimana.

Uzvišeni kaže: "Reci: 'Klanjanje moje, i obredi moji, i život moj, i smrt moja doista su posvećeni Allahu, Gospodaru svjetova, Koji nema saučesnika; to mi je naređeno i ja sam prvi musliman.'" (El-En'am, 162–163)

O vjernici, neka Allah bude najuzvišeniji u vašim srcima. Njemu iskazujte potpunu ljubav, poštovanje, nadu i na Njega se oslanjajte. Čuvajte se svega što može narušiti iskrenost vaše veze s Gospodarom. Svoje srce vezite za Allaha, jer samo On daje korist i štetu, uspjeh i zaštitu.

Uzvišeni kaže: "Ko drugog Allahu smatra ravnim, Allah će mu ulazak u Džennet zabraniti i boravište njegovo Džehennem će biti." (El-Maida, 72)

Poslanik, sallallahu alejhi ve sellem, rekao je: "Ko umre dozivajući, mimo Allaha, nekoga kao Njegovog sudruga, ući će u Vatru." (Muttefekun alejhi)





Vjera u jednog Boga treba prožimati cijeli život muslimana. Ona čisti srce od vezanosti za ono što ne može koristiti niti nauditi bez Allahove dozvole, čisti ibadete od primjesa neiskrenosti i usmjerava čovjeka da svoju vjeru gradi na Allahovoj Objavi i sunnetu Njegovog Poslanika, sallallahu alejhi ve sellem.

Našu vjeru trebamo razumijevati onako kako su je razumjeli ashabi Allahovog Poslanika i najbolje generacije muslimana koje su ih slijedile u dobru, neka je Allah zadovoljan svima njima.

Druga poruka hidžre jeste da je život Allahovog Poslanika, sallallahu alejhi ve sellem, najljepši uzor i najpouzdaniji put ka uspjehu. Koliko budemo slijedili njegovu uputu, toliko ćemo imati sigurnosti, smirenosti i uspjeha na ovom i budućem svijetu.

Uzvišeni Allah kaže: "...pa ako mu budete poslušni, bit ćete na Pravom putu." (En-Nur, 54)

Mnoga iskušenja kroz koja danas prolazi muslimanski ummet, poput podjela, nesloge, međusobnih sukoba i zbunjenosti u razumijevanju vjere, posljedica su udaljavanja od izvornog duha Kur'ana i sunneta te zanemarivanja vrijednosti koje su krasile prve generacije muslimana.

Ova iskušenja i smutnje nastaju zbog slijeđenja strasti i novotarija, te slijeđenja raznih neispravnih pristupa u razumijevanju vjere:

„...i neka se pripaze oni koji postupaju suprotno naređenju Njegovu, da ih iskušenje kakvo ne stigne ili da ih patnja bolna ne zadesi.” (En-Nur, 63).

Zato smo dužni vraćati se jasnim izvorima naše vjere, čuvati jedinstvo, međusobno poštovanje i bratstvo.

Uzvišeni kaže: “O vjernici, ne odlučujte se ni za što dok za to ne upitate Allaha i Poslanika Njegova.” (El-Hudžurat, 1)

Poslanik, sallallahu alejhi ve sellem, rekao je: “Oporučujem vam bogobožnost i pokornost vašim pretpostavljenima. Ko od vas poživi, vidjet će mnoga razilaženja. Zato se držite moga sunneta i sunneta mojih pravednih i pravovjernih halifa poslije





mene. Uхватите се за њега својим кућњацима. Чувajte се новина у вјери, јер је свака новотарија заблуда." (Ebu Davud, Tirmizi i Ibn Madža)

Jedna od velikih poruka hidžre jeste da je Allah, Svojom pomoću, podrškom, čuvanjem i uputom, uz one koji Ga se istinski boje, i koji su Mu pokorni.

Uzvišeni kaže: "Ako ga vi ne pomognete – pa pomogao ga je Allah onda kad su ga oni koji ne vjeruju prisilili da ode, kad je s njim bio samo drug njegov, kada su njih dvojica bila u pećini i kada je on rekao drugu svome: 'Ne brini se, Allah je s nama!', pa je Allah spustio smirenost na druga njegova, a njega pomogao vojskom koju vi niste vidjeli i učinio da riječ nevjernika bude donja, a Allahova riječ, ona je – gornja. Allah je silan i mudar." (Et-Tevba, 40)

O vjernici, prilikom govora o hidžri i Poslanikovom životu potrebno je voditi računa o vjerodostojnosti onoga što prenosimo. U knjigama i predajama mogu se naći različite priče koje nisu pouzdano potvrđene. Zato je važno provjeravati informacije i oslanjati se na vjerodostojne izvore i djela priznatih učenjaka.

To je danas lakše nego ikada prije, jer su nam dostupna brojna djela i pojašnjenja učenih ljudi koji su temeljito istraživali Poslanikov životopis.

Allah je zaštitnik bogobojaznih.

Jedno od najvrednijih djela jeste često donošenje salavata i selama na Allahovog Poslanika, sallallahu alejhi ve sellem.

Allahu, smiluj se, blagoslovi i spasi Svoga roba i poslanika Muhammeda, sallallahu alejhi ve sellem. Budi zadovoljan pravednim halifama, svim ashabima i Poslanikovom časnom porodicom.

O vjernici, donosite salavate i selame na onoga koji je poslan s mudrošću i uputom, najboljeg među ljudima i najodabranijeg među stvorenjima, kao što vam to naređuje vaš Gospodar: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56).

